

# 【蚊聲色變】

## 第一場：遇難求助

地點：火焰山

人物：唐三藏、悟淨、悟空、豬八戒、土地婆

OS：【風蕭蕭】

師徒同心西方行，毋驚艱難風霜冷，  
往到天竺欲求佛經，回京朝駕繳聖令。

八戒：師父啊，小等咧——

哇！火燒山，這啥真正欲烘豬肉囉！我苦矣…師父，等我-----

悟空：你嘛行較緊咧！因為火燒山擋住咱的去路，八戒、悟淨，恁兩人先恁師父去後面樹林歇暍，待我請出土地公，來去問欲按怎滅火。

悟淨：好。師父，咱來去。

悟空：土地公何在？土地公何在？

土地婆：來囉！大聖爺，毋知召喚小神有何事情？

悟空：咦？那會是你，恁翁土地公咧？

土地婆：哎哟，大聖爺！你嘛知影，初二、十六做牙，大家攏嘛會請伊  
擘燒酒，『喝酒是不可以辦事的』，有啥物代誌，問我就好。

悟空：我問你.....

【四句聯】口白

此地是怎樣的所在，為何山頭成火海？

土地婆：大聖欲問這層代，就聽小神且說來……

【都馬調】此地便是火焰山，規年著火親像出火泉，  
村民擔水袂赴潑，天降雨水也沃袂化。

悟空：既然雨水沃袂化，我調龍王用海水潑……

土地婆：且慢！大聖爺，袂用得、袂用得矣！

悟空：是怎樣袂用得？

土地婆：毋是凡火來燒山，造因是大聖……你的跂！

悟空：嘖！我的跂！

悟空：【雜唸仔】

保護師父一路行，千里迢迢才來遮，  
一喺涼茶攤猶未食，哪有時間放火燒山！  
緊將原因講來聽，若無變面你就知影！

土地婆：大聖憤怒我會驚，小神不敢騙你大聖爺

悟空：啊毋就緊講！

土地婆：大聖爺……

【耍金扇】五百年前你大鬧天宮，被老君掠去欲做藥種，  
你踢倒丹爐逃脫無影，落下火種禍無窮。

悟空：切！那按呢欲如何消滅此火？

土地婆：此去北方三十里，芭蕉洞中羅刹女，  
收藏一支芭蕉扇，要滅天火只有靠伊。

悟空：鐵扇公主！咦？這毋是我結拜大哥牛魔王的某？

既然是親戚，按呢就好講話矣！土地婆，多謝囉！

土地婆：小神告退。

悟空：事不宜遲，來去芭蕉洞共大嫂借扇！

## 第二場：借扇遇阻

地點：芭蕉洞

人物：鐵扇公主、孫悟空、八戒、悟淨、蠓仔

公主：【柳絮調】

坐鎮焰山芭蕉洞，配得翁婿牛魔王，  
逍遙自在精神爽，群妖面前顯威風。  
奴家乃是鐵扇公主羅刹女，一向在洞中修鍊，  
今日不知為何心神不寧-----在此小坐。

悟空：此地便是芭蕉洞，來去叫門。喂！內底有人無？

公主：是啥人敢佇芭蕉洞外吵吵鬧鬧？

悟空：大嫂。

公主：呀呸、潑猴是你！你竟然閣敢來我芭蕉洞！

悟空：咦？大嫂，是啥物代誌予你火氣遮爾大？

公主：哼！按呢你就共我聽詳細！

**【怒罵】**

可恨潑猴太不該，請動觀音下凡來，  
我兒禁閉在南海，母因分離是你所害！

悟空：大嫂，按呢講就毋著囉！.....

姪兒此去是登仙，福慧深厚人欣羨，  
感恩載德是不免，借我蕉扇往西天。

公主：潑猴，你！

也是因你恰吾兒有緣，隨菩薩修行，算起來確實是伊的福氣，  
悟空啊，你小等一下，我入去提扇。

悟空：芭蕉扇拿來！

悟空：怎樣閣變面！

公主：你害我吾兒受困南海，閣想欲來借芭蕉扇，真正是咧眠夢，  
今仔日看我怎樣教訓你！

悟空：那你真正是討皮痛，看招！

八戒：那會有遮濟蠓仔，一隻、二隻、三隻、四隻，啊！ ~~~~

悟空：一變、二變、猴兒出現，碰！ 猴兒，準備來去拍蠓仔！

## 第三場：滅蚊 絕招

地點：芭蕉洞

人物：鐵扇公主、孫悟空、八戒

悟空：蠓仔總算予我拍死了了啦！

公主：多謝恁的幫忙。咦？奇怪？遮的蠓仔毋知是對佗位來的？

八戒：師兄，拄才我去踢倒邊仔的罐仔，蠓仔就飛出來矣。

悟空：啊！敢會是『傳染登革熱』的蠓仔？

公主：那按呢欲按怎？

八戒：我知！我知！就是袂當有積水的問題啦！

悟空：毋但按呢喔！猴兒提來！（猴兒拿圖板）

## 【磕仔板】

『登革熱的蠓仔』竟然佇遮，個出現積水的形影，  
厝外厝內予個躑，造成『傳染病』欲按怎？（間奏）

『自我防護有「3不」』

~莫予個活、莫予個入來、莫予個叮

『徹底清除孳生源』，紗窗紗門共蠓仔趕出門，（間奏）

恁的觀念上重要，這個撇步愛做到，

毋通初一十五才摒掃，才摒掃！

悟空：簡單講，著愛注意躑的環境，做好「巡」~定定去巡巡咧；

「倒」~積水愛倒掉；「清」~罐仔愛減量；「鑊」~罐仔愛鑊清氣。

咱只要隨時注意遮的代誌，就會使『預防登革熱』囉！

八戒：師兄，你那會遮厲害！啥物攏知，閣講甲遮呢清楚！

悟空：到今你才知！

八戒：哎呀，師兄，師父閣佇遐等咱滅火呢！

公主：小等一下，我來去提芭蕉扇予恁。

悟空：多謝公主！

公主：好，我緊提這張『登革熱病媒蚊自我檢查表』來去詳細檢查阮厝的環境，  
才袂予蠓仔閣來揣我的麻煩矣！

悟空、八戒：公主，按呢做就著啦！

~~ 本劇終 ~~